

四庫全書

史部

欽定四庫全書

史部

欽定八旗通志卷

二百一  
二百二

欽定四庫全書

欽定八旗通志卷二百一

人物志八十一

大臣傳六十七

漢軍鑲白旗一  
奎 蔣赫德

盧興祖 朱昌祚  
楊方興 沈文

王可臣

蔣國柱

劉兆麒

楊方興

楊方興廣寧人後隸漢軍鑲白旗天命七年

太祖高皇帝征明克廣寧方興以諸生隨衆來歸

太宗文皇帝時命入直內院與修

太祖實錄崇德元年分內院學士舉人生員為四等方興

列二等並以

實錄告成俱得

賜賚旋試列舉人授佐領銜擢內秘書院學士七年

上行圍旋蹕方興以醉後騎馬衝突儀仗罪當死

特命免之戒後勿飲酒八年同戶部啟心郎布丹齋

勅往朝鮮申嚴禁令順治元年隨大兵入關是年七月奉

命總督河道時江南北尚多反側山東土賊叛服不常方  
興既之任置戰馬設烽堠遣將勦平滿家洞諸賊  
巢斬賊首王家樂趙應元等黃河南北兩岸自流  
賊蹂躪無人防守伏秋汎發北岸小宋口曹家寨  
隄皆潰浸曹單金鄉魚臺四邑由南陽漫入運河  
漂沒田廬二年二月方興請乘水勢稍涸鳩工亟  
築得

旨先行先是明崇禎時流賊李自成決汴水以灌汴梁其

後決口屢塞屢決至是

上命工部遴員察勘馳奏令方興修理七月河決流通集  
一趨曹單及南陽入運河一趨塔兒灣魏家灣運  
河為濁流所侵日就淤塞下流徐邳淮揚亦多衝  
決方興以防護無功自劾

諭令殫力河防不必引咎九月疏薦大梁道李芳蘊為睢  
陳道原充西道章于天為充西道密雲道方大猷  
為管河道四年流通決口將合金河下注勢甚湍

激由汶上縣決入蜀山湖方興因請修築通濟閘  
上下隄岸淮安東北之蘇淤馬羅等隄及江都高  
郵諸石隄復言河員必就近陞轉庶能熟諳河務  
並奉

諭施行尋以流通工竣加一級六年晉兵部尚書銜七年  
三月加太子太保八月河決荊隆口南岸漫單家  
寨西隄北岸漫朱源寨小長堤南岸旋塞全河盡  
入北岸決口轉向東北流方興用河道方大猷議

先從上流築長縷堤遏其來勢然後築小長堤決  
口期以春月鳩工半年歲事九年三月方興以目  
疾請休得

旨河漕重任實難其人卿籌畫素著宜悉心料理旋以汴  
河工成

賜方興及在事各員鞍馬白金有差時荆隆決口未合者  
尚三十餘丈大猷擢江南按察使方興請

勅部以新銜留管河務又言清口為淮黃交匯伏秋淮弱



黃強黃每內灌濁沙淤澱歲需挑濬請於清江通  
濟二閘適中處修復福興閘舊址啟一閉二以時  
蓄洩歲可省挑濬費俱下所司議行會給事中許  
作梅御史楊世學陳棐交章請勘九河故道使黃  
河北流入海方輿因疏言黃河古今同患而治河  
古今異宜宋以前治河但令赴海有路可南亦可  
北故賈讓以不與河爭為上策自元明以迄我

大清定鼎燕京東南漕運由清口以至董口二百餘

里必藉黃河為轉輸是治河即所以治漕可以南  
必不可以北欲挽北流而趨南自不得不逆其性  
而曲為隄防故賈讓下策正今之上策也前人幾  
許經畫成此數千里長堤束水通漕若廢此不治  
順水北行無論漕運不通轉恐決出之水東西奔  
蕩不可收拾今議者乃欲尋禹舊蹟重加疏導勢  
須別築數千里長堤較之增卑培薄難易曉然且  
河流挾沙俱行束之一則水急沙流播為九則水

緩沙積數年以後河仍他徙何以濟運議者又謂  
河經修築即當永遠無虞不知黃河自積石入中  
國後源遠支繁每遇伏秋汎發漫衍橫決有非堤  
岸所能禦者自殷周至今已事可考臣愚以為河  
不能無決決而不築司河者之罪也河不能無淤  
淤而不濬亦司河者之罪也若欲保其不決不淤  
誰敢任之明河臣潘季馴曰治河必無一勞永逸  
之功止有補弊救偏之策不可有喜新炫奇之智

惟當收安常處順之休斯誠不易之確論伏愿

勅下廷議定畫一之規屏二三之說俾河臣知所遵守不  
勝幸甚疏上

上嘉納之十年河決大王廟口距朱源塞口不遠給事中  
周體觀劾方興治河罔效耗帑害民罪方興遵

旨回奏言臣自奉

命總河九載疏築如法漕運無悞所有興工緩急役夫多

寡並經請

旨施行未敢稍有延緩及擅加科派事因懇請罷斥奉  
旨向來河工皆就決處堵塞僅顧一時以致久無成效今  
山東又報河決現在會議楊方興且殫心料理毋致悞  
漕章內事宜下部一并會議方興再疏乞休

上溫詔慰留之十一年給事中林起龍劾方興堵塞築朱源  
決口侵冒錢糧累民捐費至六十餘萬兩徇庇河  
道方大猷諸奸貪不法

上命方興解任赴京質對起龍坐誣鐫秩

命方興復任十三年方大猷以婪贓悞工為直隸總督李

蔭祖所劾方興亦疏劾大猷

上以其不先舉發傳

諭切責于是給事中董篤行疏劾方興徇庇下部議坐降

級留任九月考滿蔭一子入監十四年引年乞休

上以其久任河道總督勤練著勞

命以原官加太子太保致仕康熙四年卒

賜祭葬如典禮

沈文奎

沈文奎浙江會稽人少時寄養外家冒姓王氏年二十為明諸生北遊遵化天聰三年

太宗文皇帝征明下遵化文奎來歸貝勒豪格攜至瀋陽命直文館後隸漢軍鑲白旗六年貝勒阿濟格等征明至宣化明守臣遣使輸貢議和師還

召賜文奎饌

問此次和議於爾意云何文奎奏曰漢人以宋轍為鑒俱

諱言和雖以

聖主好生之念不忍明國生民塗炭欲安息待時而漢人  
反以我為可欺邊塞小臣區區盟誓安足信哉但  
彼既民窮財竭盜賊蜂起且去年大凌河陷沒人  
人膽喪當此危急之際翻然悔禍則允其議和實  
明國之幸也不然以

聖主之威武乘中原擾亂之秋率兵直入黃河以北非明  
有矣崇德元年



特旨甄別內院人員分為四等文奎名列一等第二

賜人戶及牲畜等物授宏文院學士七年八月以飲醉乘

馬失避

御前儀仗罪論死

上特宥之仍

諭以嗣後毋飲酒致有錯誤順治元年

世祖章皇帝定鼎京師授保定巡撫駐正定明三關總兵

郝之潤既投誠願除寇自効旋以被劾解任文奎

將抵任得其手書且聞其率部卒馳至倒馬關暫  
駐形跡乖張慮其外連山右流寇釀成禍患特劄  
諭寬慰曉以禍福旋令總兵吳勝兆率精銳步騎  
疾馳赴鎮以備不虞而密疏奏請收其所部以需  
後效之潤遂留保定就文奎策遣先是畿南未定  
土賊蜂聚若大名之開州內黃正定之井陘獲鹿  
保定之束鹿唐完所在千百成群焚掠村堡文武  
守吏分勦不遑間復招撫諭降給劄獎勸而賊勢

愈熾一賊聞勦羣賊援拒文奎既莅任訓練標兵  
飭厲將士與按臣衛周允商權機宜設策勦撫賊  
黨趙崇陽等數百人絡繹歸誠會寧晉叛寇韓國  
壁等抗師負固文奎即遣崇陽星夜擒勦陣斬國  
壁殲其逆黨復遣署總兵王燦等討滅香鑪寨賊  
渠錢子亮喬家寨賊渠趙建英別遣守備劉文選  
等攻圍深州賊渠于小安晉州賊渠馬數全所至  
賊巢蕩洗於是冀州賊郭世先保定賊李庫內黃

賊李君相順德賊袁三才等數十渠魁一時並就  
俘戮賊黨解散其投誠驍健獻械及馬願自効者  
收標下驅策之畿南始定十二月疏薦明修撰兼  
給事中陳名夏才學兼優可當倚任章下所司是  
時保定等府州縣徵納賦課猶照襲明季舊例有  
優免太濫致虧正額者亦有取盈攤派刻剥厲民  
者文奎奏定悉照正條一切陋弊槩行禁革又以  
寧晉莊地利廣租輕多為各郡邑豪戶佔據遞年

逋欠籽粒銀兩守令代償墊解疏請嗣後凡莊地  
盡召土著小民佃種立甲徵收豪戶紳衿槩行禁  
絕明年正月疏言畿南兵燹之餘民力困竭每歲  
解京芝麻綿絲等物俱購之別省既難即得且物  
貴民貧運解不易請俱改為折色二月又疏請各  
衛所地畝錢糧令州縣徵收屯丁兼屬管攝凡軍  
宅屯莊槩入保甲至於邊戍既裁軍裝雜派之需  
應行革除諸疏並見採擇四月天津土寇李聯芳

張成軒等橫行南皮鹽山間聚衆千人文奎遣都  
司楊澄守備徐景山率精銳間道星馳擒勦復與  
天津道陳鵬舉分路追襲擒斬聯芳等九十三人  
特旨嘉獎旋

命調任陝西未赴任復

詔仍留保定巡撫五月擢淮揚漕運總督文奎以漕運當  
明代末年百務隳廢加以江淮寇殘兵虐凋瘵之  
後今欲規創一新永垂久遠事非易易奏請

陞見叩聆

聖訓有

旨淮揚初定督漕正急著星馳受事殫力經理以副委任  
文奎至則淮揚徐三府方遭寇逆高進忠魏用通  
高陞之亂文奎檄調官兵勦撫並用先諭降進忠  
營將孔道興等八人皆率所屬兵丁戰艦軍械投  
誠進忠等遂潛遁入海有偽招討鄧報國偽兵部  
司邦基者假擁立明宗新昌王為名訛言惑衆於

是魏用通高陞復突入河內拒捕刼殺鎮臣王天寵率將士奮擊陣斬高陞文奎遣遊擊裴應陽與降將孔道興等追斬魏用通於白駒場賊衆殲滅殆盡尋鄧報國司邦基為其將王大功馬西祿擒縛以獻進忠走崇明納降十二月復擒斬如皋叛渠于錫凡劉一雄等散其餘黨萬餘人海濱底定三年二月奏增設淮北淮南淮西各道標營兵戰艘八月邳州土寇楊秉孝王君實等嘯聚黨與掠



民肆害將攻邳城文奎率淮徐道張兆罷調兵擒  
斬之十月疏請禁漕弊其畧曰江南蘇松等府  
徵漕前代以來積弊殊甚有司催徵止及城鄉小  
戶運船到次先兌民糧里書倉蠹串通旗丁抑勒  
需索小民受累非一官戶儒戶之糧堆貯私家運  
官旗丁沿門赴兌米色好醜斗斛完欠概置不問  
此紳衿誤漕之害也府縣吏胥假濟農倉耗米為  
名乾沒侵肥臨兌升合無完此吏胥誤漕之害也

臣請嗣後不論官戶儒戶濟農名色槩令有司與民戶一體督催及時上倉候船領兌如倉糧驗係乾潔運船刁難不速領兌者領運官重寘以法如紳衿豪勢抗不交倉以致稽延漕運者題劾逮問並治有司以不能革弊之罪部議准行且著為令四年正月以擅免荒田稅賦又瀆請明朝陵寢祀典坐革職五年十二月起補宏文院學士六年正月充纂修

太宗實錄副總裁官二月充會試主考官八年閏二月部

議文奎于大學士剛林等擅改

實錄不行陳奏應革職議政王大臣等覆勘論文奎無罪  
得

旨免議四月復受

命往淮揚總督漕運七月疏陳漕政四事一曰慎選運官

明季世職既裁勢必選用舊弁其身家殷實者又多巧為規避所餘窮員無幾以致白丁市僧鑽營

領運無不逋欠今請一體遴選道府各官毋許徇  
隱一曰清核舍餘前明衛所世職裁汰既久所有  
親族謂之舍餘不入民籍不當軍差今請旗丁十  
名以舍二軍八為率以均勞逸一曰合選殷丁一  
伍之中殷實有限今請自臣衙門為始不論吏書  
及生員之餘丁悉令僉選不許隱庇一曰清勾黃  
快屯丁江南各衛軍丁明季編定各差如屯軍領  
種屯田歲照科則輸糧黃快船丁每年止納丁銀

三錢運戶則專供撥運近來運戶稍富厚者皆竄入黃快屯軍借為護符以致運戶日減僅餘空乏閒丁僉報抵數今請嚴察清勾以杜隱漏之弊下部議行十年十月膠州總兵海時行叛文奎奉

命偕直隸河南山東總督馬光輝統官兵進勦軍次永城兩路夾擊俘斬甚衆時行勢窮自殺其黨李文進率子弟及所部赴軍前降文奎以功加一級

予廕一子時江北廬鳳淮揚等府州縣水旱相繼被灾甚

者已奉

詔蠲賑文奎請將十年漕糧照被災分數議折十年現徵  
及九年前宿逋酌量蠲免部臣以漕糧為軍餉儲  
需萬難議折而鹽道及廬鳳各屬覆勘被災分數  
尚未詳悉申報亦難議蠲往返咨駁各屬候覆改  
折至冬盡猶未開徵十一年逋泰海濱叛寇朱周  
錡稱為號糾衆惑民為同謀者所首文奎遣兵擒  
獲悉誅其黨又奏墾江北荒地九千九百餘頃

是歲九月以催運稽遲降三級調用尋補陝西督糧道卒於官入祀名宦祠

蔣赫德

蔣赫德本名元恒世居遵化天聰三年

太宗文皇帝統師征明克遵化選儒生俊秀者送

盛京入文館讀書元恒與焉

賜名赫德崇德元年授秘書院副理事官

賜人四戶及牛驢七年分編漢軍八旗赫德隸鑲白旗順

治二年四月擢國史院學士五月充明史副總裁  
三年四月教習庶吉士四年三月充

殿試讀卷官六年正月充纂修

太宗文皇帝實錄副總裁五月復

命教習庶吉士七年四月以繙譯三國志成

賜鞍馬九年三月充

殿試讀卷官五月因朝鮮國王李滉陳奏國內外奸  
徒陰謀詛咒圖為不軌俱已伏辜事赫德同侍郎



伊勒都齊賚

勅往朝鮮慰問十一年三月擢國史院大學士十二年正月奉

詔直陳時務疏言察吏而後可以安民除害而後可以興利方今百姓大害莫甚於貪官蠹吏懲治之法惟恃督撫糾劾以其確知屬員之賢不肖也每見各督撫彈章指事列款贓跡累累及奉

旨提問招擬覆奏計贓科罪不及十之二三不曰事屬子

虛則曰衙役作弊即坐衙役者又多引雜犯律例聽其贖免何所懲憚而不肆行其志乎其始也官胥朋比虐取瓜分事敗之後官則嫁名于吏以覲然灰吏則假貨于官以成展脫究之官吏優游兩獲無恙糾劾雖行竟成故事此因循之積弊也請天語嚴飭嗣後各督撫糾劾貪官審結覆奏之時必全述原叅疏語款數於前註明開報官及承問官職名某款不實或係開報官捏造或係承問官故縱務

窮源質訊使是非不容並立果係衙役詐騙者亦按律坐以應得之罪不准折贖則貪蠹清而民生蘇息矣得

旨下所司嚴飭行二月

諭獎密勿抒誠贊襄竭力諸臣加赫德太子太保十四年正月修輯

太祖高皇帝

太宗文皇帝聖訓以赫德為總裁十五年七月改內三院

為殿閣銜授文華殿大學士兼禮部尚書十月充

武

殿試讀卷官十六年三月

諭獎勤勞素著諸臣加赫德少保兼太子太保九月同侍

碩博輝齋

勅往封朝鮮國王世子李柁為朝鮮國王十七年二月引

疾求罷得

旨卿清慎素著佐理有年念時有疾病准解任調理康熙

元年六月復設內三院

詔起為宏文院大學士二年三月調國史院大學士九年

九月卒年五十有六

賜祭葬如例謚文端

盧興祖

盧興祖漢軍鑲白旗人順治三年由國子監官學生授工部啟心郎九年

命增設漢軍巡城理事官五人興祖巡視西城十四年遷

大理寺少卿十八年五月擢廣東巡撫疏言粵東  
近閩漳海氛出沒當設守禦臣有壯丁百馬百乞  
帶往以補標兵老弱無格外費而得實用部議如  
所請康熙四年二月遷廣東總督四月疏言屯田  
每畝起料三斗或二斗零明時給軍聽取佃是以  
責重而倍收我

朝汰軍為丁計田而賦屯丁即民戶屯糧多民糧十  
之九過重難徵請

勅議照民田輸納永除屯困下所司知之五月疏言水師戰一守二守惟事帆槳戰則專攻擊百人登舟禦寇止三十餘人接應勢寡請改為戰守各半得

旨俞允六月疏言省會面海居中四應非船不濟從前設防偵勦皆撥用同城水師哨船今水師提督移駐順德總兵分駐廣海新安無船可調請於臣標增哨船十二水兵六百守備千總各一部議哨船如所請行水兵於督標選委守備千總毋庸增七月

疏言營汛分布要隘必有統率而後力專廣屬諸  
汛隸水師鎮自鎮臣分左右路水陸不能兼轄營  
自為汛勢殊渙散請將三水龍門從化增城順德  
等營屬廣州城守都司轄新寧營屬新會遊擊轄  
東莞大鵬二營屬新安遊擊轄那扶營屬廣海叅  
將轄香山副將無附汛自為一營計分五路諸營  
各歸統轄庶事有專責汛守分明從之尋裁廣西  
總督



命興祖兼制八月疏言廣西歸併廣東總督仍駐肇慶城  
內有協鎮將軍駐劄已無隙地今臣標移駐請移  
將軍駐省議如所請時遷南洋總兵入內地兵民  
乏資興祖倡率捐銀安置尋疏言南洋為全潮門  
戶奉

旨勘議村莊遷內地外其應留者附并海陽為便至汎地  
尤衝險議設遊擊一增守備一把總二兵千船二  
十屬潮州鎮轄又自郡城達南洋原定以急水為

出入之口凡糧運仍令該管文武照票稽查下所  
司知之五年八月疏言粵西土司昧倫嗜利爭替  
襲連年不鮮教化莫過學校請將土司俊秀子弟  
在附近左右兩江諸府縣肄業考試其文義通達  
者每縣取二名入學俾知觀感爭端亦足止遏下  
部議行六年九月因盜劫案日多興祖自陳乞罷  
斥疏下部議尋議興祖不能屏息盜賊應革任從  
之十一月卒

朱昌祚

朱昌祚漢軍鑲白旗人

世祖章皇帝時任宗人府啟心郎順治十八年四月授浙江巡撫既抵任會浙東西所在旱災昌祚捐金為倡煮粥以活饑民復具疏請

旨賑恤時海寇未靖有

旨令瀕海居民遷移內地昌祚疏請酌撥荒田給令開墾為生俟三年成熟後照例起科其舊居所棄之田

畝丁糧請予蠲免俱下部議行先是陝西巡撫扈  
申忠條奏軍民宜一體聽徭

勅下督撫議昌祚奏浙省各衛所均有運糧之責其閒丁  
每年亦各賦丁銀以為貼造糧艘之費與秦省衛  
所無糧運者不同難以復兼民役事遂寢康熙三  
年六月擢福建總督以丁憂未之任四年

特起直隸山東河南三省總督請終制不允五年抵總督  
任疏言直隸督標經制額兵舊駐河間提標額兵

舊駐大名今總督駐劄大名提督改駐河間若令  
兩標兵彼此調移恐攜帶家口致累民間請免調  
兵丁但更換統轄之員為便得

旨俞允時輔政大臣鰲拜以鑲黃旗地畝瘠薄傳

旨圈換正白旗地畝及開墾成熟民地令朱昌祚同戶部

尚書蘇納海巡撫王登聯經理其事昌祚疏言直  
省州縣田地之瘠薄膏腴賦稅之上中下則原自  
異同豈能盡美今令兩旗更正地土欲其相安但

臣見現在行圍地畝皆曉曉有詞大概以瘠易腴者固緘默不言而以腴易瘠與以瘠易瘠者不免觀望嗟呼皆不樂有此舉雖勉強撥給難必其異日不出而申訴重煩

睿慮臣思安土重遷人之至願兩旗分得舊處莊地二十年來相安已久靡不有父母墳墓在焉一旦更易不能互相移徙且值此隆冬各旗率領所屬沿村棲宿守候日久窮苦者裹糧已盡凍餒可憫又附

近百姓聞

朝廷此舉所在驚惶日據士民環門哀籲有謂州縣  
熟地昔已圈去無餘今之夾空地土皆係所遺窪  
下經墾闢成熟當差辦稅者有謂地在闕廟大路  
鎮店所居民人皆承應運送

皇陵物料並墊道修橋及一切公差徭役者有謂被圈地  
之家即令他往無從投奔者有謂時值冬令扶老  
攜幼遠徙他鄉恐地方疑爲逃人不容棲止者有

謂祖宗骸骨父母邱壠不忍拋棄者臣職在安民而民隱如此曷敢壅蔽不以實

聞臣又徧察薊州及遵化等應換州縣一聞園丈自本年秋收之後周遭四五百里盡拋棄不耕今冬二麥全未播種明年夏安得有秋且時已仲冬計丈量事竣難以定期明春東作必又失時而秋收亦將無望京東各州縣合計旗與民失業者不下數十萬人田荒糧竭無以資生豈無鋌而走險者地方



滋事尤臣責任所關又不敢畏忌越分不以實

聞伏乞斷自

宸衷毅然停止疏入與蘇納海王登聯請停圈各疏並忤  
鰲拜意革職逮問刑部議律無正條擬鞭責籍沒  
家產鰲拜入奏應置重典

上未允鰲拜出矯

旨並予立絞八年鰲拜獲罪逮繫

上特諭吏部曰原任總督朱昌祚巡撫王登聯於撥換地

畝時見旗民交困因有地方之責具疏奏聞鰲拜輒謂非其職掌妄行干預不按律文誣陷至死深為可憫其予昭雪以示仁恩昌祚復原官

賜祭葬如典禮謚勤愍祀直隸浙江名宦祠子紱以廕入監讀書授督捕理事官尋遷大理寺卿

王可臣

王可臣陝西人順治三年肅親王豪格統師定四川可臣來歸即令同諸降將石國璽蔣登雷率其

降卒七百人為大軍前導進勦三寨山賊乘夜由  
小路登奪其東門克之師旋隸正白旗漢軍予騎  
都尉世職准襲二次六年十月隨都統石廷柱征  
叛鎮姜瓖至澤州獲偽官有功十年七月隨經畧  
大學士洪承疇南征舟至嶧縣臺兒庄有正藍旗  
騎都尉張任先抽刀欲向提督李本深可臣驍壯  
多力扼而奪之洪承疇入奏

詔草張任先職治罪賞可臣銀三十兩師至湖廣委左標

遊擊駐防常德府十二年正月授經畧左標右營  
遊擊時明桂王朱由榔據雲南以流賊餘黨孫可  
望李定國劉文秀馮雙禮等為將出入川黔分兵  
犯常德可臣率兵于沅溪西南江邊設伏伺賊船  
過半邀擊之賊敗奔德山沿江堵勦斬溺無數得  
優賚冠服弓刀十三年九月隨大將軍阿爾津進勦辰州

敗賊于瀘溪縣十五年三月大兵進取貴州可臣  
督率兵丁由沅州伐木造大江橋修路六十里並

紀功十六年二月可臣同水師副將石玉貴擊賊于風落壩擒偽副將蕭聲玉復追至三會塘生擒偽總兵李正洪及其子并獲偽叅將曾學仲等三月會各標兵于湄潭縣招撫偽副將薛萬珠蔡魁敗馮雙禮子偽總兵天裕于泥落壩擒偽總兵盧正友等踞木猴屯可臣同叅將陳福等分兵兩路擊敗之疾追至席樂坪馮天裕復合偽總兵冉宗孝馮任國等踞合馬箐抗拒可臣同叅將張攀龍守

備王友名分三路圍攻親冒矢石自寅至午大破賊巢斬馮天裕馮任國等又射死丹宗孝于萬佛山追盧正友于瓜子溪斬之十七年十一月遷貴州提標中軍叅將兼管左營事十八年九月黔逆劉鼎結連丹平土司莫之廉等犯定番城官軍赴援却賊可臣掩擊賊衆于城西北歸路斬級甚多復由谷龍一路進破楊城壘賊巢康熙元年貴州土司李國柱謀犯鎮西可臣同遊擊席登雲董朝

祿等領兵援勦陣斬國柱十一月丹平土司莫之  
廉窩藏劉鼎抗拒官兵總督楊茂勲令可臣統領  
督標叅將南容安順鎮標遊擊劉學正馬步兵由  
定番東谷嶺西路進攻會都勻叅將龍畧于丹平  
合力擒勦之廉退保西梁踞八貢山迎敵攻克之  
擒總管廖國忠之廉走大洞可臣議四面進攻自  
率標兵當大洞之前分撥南容截其後劉學正擊  
左龍畧擊右乘夜進兵未明舉礮官兵奮勇四合

殺苗衆三百餘人之廉見勢迫竄後路為南容所  
獲餘黨及家屬被擒事

聞下部紀功三年三月隨征水西駐營六廣苗目阿布者  
密約賊劫營可臣同各鎮兵乘夜過河至化乍地  
方埋伏俟賊過掩擊斬殺甚多又大敗苗賊于塔  
寨箐口可臣生擒苗目黑者子受斬之四月進師  
勦箐洞自雪棚起營直抵賊穴攻克阿哈箐口進  
勦至黃沙渡多斬獲六月同總兵王友進領兵往



雄所則溪一帶搜勦由抬石壩進抵阿利木江菁  
賊潰遁追逐四十餘里至明家渡殺賊千餘獲馬  
匹器械七月同總兵李如碧前進渭河七山及遵  
義隣界克高寨坡箐及法中石叢山等八砦殺逆  
目九名賊千餘十一月賊目陳老善嘯聚東隆箐  
可臣領兵至魚孔衝殺賊衆追至賊窩斬陳老善  
等二百餘級獲器械二百餘又同千總張啓鳳從  
樂搗砦追賊至大木廠擒逆目阿市等三名尋授

西寧鎮總兵官九年正月敘平水西滇黔等處功  
加署都督同知十二年十月擢湖廣提督尋以逆  
藩吳三桂反留新授雲南提督桑額于湖廣令可  
臣回京十五年二月授鑾儀衛使十六年六月授  
廣東提督疏請隨帶平日親信之八旗閒散官治  
儀正文養謚等三十四員給副將以下職以資防  
勦又請復提督駐劄惠州為省城犄角以便往來  
援勦並從之又疏言粵東初附兵心未一欲收其

兵惟餉是賴當此變亂之餘庫藏未免空虛糧餉  
或有不給臣標額設兵五千名粵省甫定必多缺  
額若俟到任召募恐一時不能即得擬于出京之  
日沿途召募年力精壯弓馬嫻熟之人以恩結之  
收為腹心帶之入廣即充臣標經制額兵先給月  
餉以為路費仰懇不拘常例發內帑十萬兩沿途  
應用仍于到汎入伍之日按月補還作正開銷以  
其餘交貯司庫充經制兵餉士卒感

恩必飽騰奮勵以圖報効矣下部議給五萬兩十七年三月卒于任加贈左都督

賜祭葬如例謚襄敏部議可臣原領庫銀五萬兩置備馬匹器械支給俸餉及召募兵丁安家行裝銀扣抵准銷外尚有沿途挪用銀九千餘兩應于其子朝用朝欽名下追賠

詔以可臣効力行間勤勞有年優免九月總督金光祖奏可臣次于朝欽頗稱驍勇可臣臨危欲其承襲世

職行間効力其闕中所帶親丁二百餘皆久經征戰精銳之士各有餘丁約可挑選壯勇五百名令朝欽統領立為援勦營下部議朝欽襲騎都尉授兩廣督標援勦營遊擊嗣以入粵召募各兵月餉扣抵無以存活逃散將半僅存二百五十名隨朝欽入援勦營從征粵西朝欽復呈請豁免未扣足銀二千七百餘兩奏入

特旨免扣十九年隨金光祖入潯州會勦叛賊馬承蔭由

水路攻取弩灘碧灘進克武宣縣復柳州十一月  
隨大軍進勦逆孽吳世璠于雲南二十年二月率  
本營兵為頭隊攻石門坎奪第一峰隘口進攻黃  
草壩直抵雲南省城領親丁殺賊有功尋令署援  
勦副將二十一年還京敘黃草壩功加十等授左  
都督二十二年八月補巡捕北營遊擊十一月遷  
四川龍安營叅將二十五年四月敘雲南省城殺  
賊功由騎都尉加一雲騎尉二十七年九月遷福

建延平副將三十三年三月卒子治襲雍正四年  
改隸鑲白旗

蔣國柱

蔣國柱漢軍鑲白旗人父筌官佐領國柱初充官  
學生順治四年授都察院啓心郎十一年二月遷  
僉都御史十月擢工部右侍郎十三年六月調戶  
部左侍郎十月

命提督操江兼安徽巡撫十五年八月部議國柱任工部

時監造

乾清宮工程不固應革職得

旨追奪賞賚從寬留任九月以漕額全完又捐賑寧國太平水災貧民加兵部尚書十六年二月疏言海賊鄭成功謀犯內地臣膺操江重任未敢刻忘戒備如下江南岸圖山營北岸三江營逼近海洋洲港錯雜上之瓜州京口人烟輻輳漕糧數百萬由茲北上海逆耽耽思逞匪朝伊夕臣數次巡視凡烟



墩礮臺木樓悉修整以資偵守抽調操撫兩標官兵隨帶戰馬船隻設防于瓜州等處隘口分班巡徼圖山三江之界譚家洲以北則列巨纜橫江洲以南則置木牌截流謹以布置機宜及長江險要形勢繪圖陳奏得

旨圖留覽下部知之三月調江寧巡撫先是正月國柱疏劾按察使盧慎言貪虐在巡撫衛貞元糾叅之後奉

旨回奏以司道未揭百姓未控申辯下部察議始既徇隱  
後復巧言支飾應革職得

旨留任六月國柱自江寧之蘇州抵鎮江海賊已陷瓜州  
國柱與提督管效忠率兵沿江堵禦賊衆登岸官  
軍迎戰失利退回江寧副將高謙等以鎮江城降  
賊國柱退駐常州檄調崇明總兵梁化鳳率兵四  
千赴援七月國柱進軍丹陽梁化鳳趨江寧會滿  
漢兵擊賊賊潰遁國柱即率標兵馳至鎮江遇賊

擊敗之城。中賊縱火乘船遁。遂復鎮江。鄭成功引賊船二千餘將襲崇明。國柱遣遊擊劉國玉等趨崇明守禦。檄梁化鳳還鎮。八月疏言。自江寧大捷之後。料賊必犯崇明。急令鎮臣旋師未渡。而賊艚大至。臣親至七了海口相度形勢。海面遼闊。距崇邑二十餘里。遙見施翹河等處賊艚密布。即發各營兵船出口。敗賊于白茆翼日。鄭成功親統大艚二千餘齊至崇明。上抵平洋沙。下至排沙。銜尾停。

泊別遣兵數萬登陸豎木寨雲梯用礮攻城遊擊  
劉國玉等奮勇堵禦連敗賊衆大軍出七了口賊  
乃南遁獲大礮器械船隻木城無算得

旨下部察敘十七年三月論失陷鎮江罪應斬

詔從寬革職籍沒十八年四月國柱以鎮江失守後即檄  
梁化鳳軍援江寧及崇明敗賊事列疏自陳

聖祖仁皇帝諭曰蔣國柱失陷地方在先其後有効力立  
功之處酌量官職補用九月補右通政十月遷秘書院

學士尋授山東巡撫康熙元年疏言登文兩營歲需兵餉十五萬有奇坐派登州府屬就近支領自遭于七變亂以來徵輸難繼請動藩庫銀五萬兩解運支應俟催徵補還下部議行二年三月疏報丈量樂安壽光等州縣竈地共清出一千四百一十頃有奇有自前明以來編入民糧者有因人戶俱絕報作迷失者應撤出歸竈其民地缺額糧銀請于荒蕪地內勸諭開墾補足完課從之五月丁

憂回旗六月議敘國柱在山東察解逃人九百餘  
名加工部尚書進階正一品三年六月授浙江巡  
撫四年三月疏言杭州地狹民稠無尺土不輸將  
國課駐防滿兵樵採未免病民請于額餉之外加  
給柴價銀兩部議各省滿兵餉有定額無支給柴  
薪之例其兵丁樵採恐損民間桑樹令將軍禁止  
五年三月疏言浙江寧台溫三府頻經海寇自順  
治十八年間遷沿海居民於內地樹椿為界以杜

通海之奸而患始息其界外丁田錢糧已于康熙  
元年題准蠲除界內荒田招墾九萬餘畝尚有水  
衝沙壓一十六萬二千一百餘畝舊課未除莫敢  
承佃此界內田土之無徵也界外雖經蠲除尚有  
匠班漁戶等課不入丁田失于開報今海禁既嚴  
片板不許下海匠戶逃亡稅課疊欠此界外  
田土之失報也今勘丈確實合界內界外請蠲銀  
一萬五千八百餘兩米二千二百餘石以甦民困

仍將界內田地設法招墾俟三年成熟起科又請  
蠲仙居臨海二縣續報荒田無徵銀五千四百餘  
兩又奏台溫等六衛所及歸併縣徵之金鄉海門  
等四衛屯糧蠲除軍興時加增銀數照舊額徵輸  
內有積欠金鄉改入平陽界外屯田無徵銀三百  
二十餘兩並請蠲免俱下部議從之四月疏言處  
州一郡僻處萬山之中疊石為田水旱易困前明  
即遭寇虐至順治十五六年始盡滅除丁戶凋零



歲賦缺額統計麗水等九縣荒田三十九萬五千三百餘畝荒地五千八百餘畝每歲無徵銀三萬二千餘兩無徵米二千四百餘石積年未完正項錢糧十餘萬兩自順治十六年以來縣官因錢糧被叅降革與憂鬱身亡憤激自經者計三十餘員催科計拙官民交困請全行蠲免逋欠荒額責令道府縣招墾照例起科得

旨麗水等九縣田土荒蕪錢糧疊欠經徵縣官被叅降革

亡故至三十餘員巡撫以下官平日所司何事明白回奏于是前任巡撫朱昌祚總督趙廷臣皆奏言邇以處州田荒賦欠屢檄清查實荒田畝確數因處屬田段零星崖谷溪澗按弓積步未易科算且數年間印官緣逋賦降革死亡者多冊報不齊未經題請今丈量確實應如國柱奏蠲免並下部議行六年九月自陳求罷部院議國柱莅任以來于地方事務頗著勤勞

詔照舊供職七年正月疏言部議裁守巡各道一百八員  
以為節省裕餉之計浙省九道盡在裁汰之中所  
留四十員內有福建廣東巡海道各一江南淮海  
道一山東登萊道一蓋因封疆重務惟防海為急  
浙省寧台溫三府尤為海洋衝要之區有招撫投  
誠安插流移諸務請設寧台溫巡海一道駐劄台  
州下部議從之八月浙東被水國柱由台溫至處  
州紹興履勘請分別蠲免各縣銀五千七百餘兩

并臨海天台二縣衝沒田畝全除額賦下部議如  
所請十二月卒于官

賜祭葬如例

劉兆麒子殿衡

劉兆麒漢軍鑲白旗人順治七年由官學生授秘  
書院編修洊遷宗人府啟心郎十八年十月遷都  
察院左副都御史十二月授湖廣巡撫康熙元年  
九月疏陳漢陽安陸鄖陽等府霖雨害禾二年六

月疏陳武昌通山等十七州縣旱災均得

旨蠲賑有差時李自成遺黨劉二虎郝搖旗等尚據鄖襄山寨兆麒疏言鄖襄二府所屬南漳穀城保康等縣額賦久因用兵蠲豁今大兵會勦賊寇指日蕩平但開墾招徠尚需時日請仍舊免徵四年五月疏言謀殺刦盜罪大惡極自為常赦所不原至其中牽連之犯情罪本輕近例不准援赦議免未為平允請仍遵康熙元年以前例俱下部議行五年

八月疏報督墾荒田六千三百五十餘頃歲徵米  
麥六千四百餘石銀六百三十餘兩下部議敘加  
工部侍郎銜七年擢四川總督抵任後奉

旨裁缺兆麒疏言蜀中遞遭寇氛人民多散居他省今久  
經底定因山川險遠行李維艱遷延不歸土曠人  
稀如故請暫開招民事例官員有能捐資招撫者  
分別議敘好義人民亦量加獎勵庶流民得返故  
鄉荒田益資開墾臣目擊荒殘情形不敢以裁缺

去任壅于上

聞又疏言臣在楚時奉

命督川即知川省民稀因檄行楚屬郡縣凡有流寓川民  
願歸原籍者准與攜行量給資斧船隻現在陸續  
到川有七百餘戶三千餘丁口已安插得所

詔與議敘加兵部尚書銜八年三月補閩浙總督十二年  
疏報招撫海賊鄭錦之偽都督阮欽偽副將林震  
溪等以戰船十三攜所屬裨校二十餘員兵二百

餘名投誠又偽將軍林伯馨都督施轟等以戰船三十攜所屬裨校百五十員兵一千七百餘名自臺灣赴浙投誠九年四月疏薦興化知府慕天顏堪勝新設興泉道俾董造臺寨督修戰船部議不准

特旨如所請七月疏言舊定報災之例夏災不出六月終旬秋災不出九月終旬康熙七年部議改定夏災不出五月二十日秋災不出八月二十日伏思五



月正在仲夏八月正在仲秋距季終猶隔四十日  
安心遇災不在限期後恐有司之不爱民者藉口  
定限壅蔽不報能愛民者反以申報違時枉受叅  
罰請仍照舊例定限以遇災情形先報即委員勘  
明輕重分數一月內續題以便部覆請

旨蠲免下部議從之并疏報杭嘉湖紹四府水災請蠲免  
額賦有差是月奉

勅諭條議防海機宜與巡撫范承謨提督塞白里會奏八

疏一禁止通海姦民宜先使近海窮民得所凡無業之民按戶造冊以無主田地官給牛種責成開墾則冒險犯禁之事息又申嚴保甲令防汎弁兵察報奸商土豪窩隱者連坐互相保結則偷越交通之弊除二豫備戰船賊據邊海島嶼窺伺內地官軍剿禦惟船便捷通計寧台溫三處現存大小戰船及新投誠者共一百六十船撥定海八十黃巖溫州各四十分防會哨先示招徠繼行追捕焚

巢擣穴以靖海氛三整練水師海面風濤變幻不  
常一操一縱勢爭頃刻宜責成將領及時操演使  
將與兵相習人與器械相熟方為有用之師原議  
浙省裁兵三千六百名應留二千名改充四備臺  
寨以傳報警信禦賊緝姦五請設黃巖總兵黃巖  
為台州門戶裁寧海鎮移駐以資彈壓六請設寧  
紹台溫四府海防同知各一員七請調陞官員以  
示激勸寧台溫三府監司守令職掌刑名錢穀之

外有緝奸防寇儲運軍糈督修臺寨戰船諸務責  
任重而處分嚴與腹地迥不相侔宜量才調補從  
優敘陞以示鼓舞八請令督撫提督巡行沿海要  
汛俱下議政王大臣議沿海官員調補優陞仍照  
現例行留兵二千及設海防同知不准餘俱如所  
請先是分設福建總督至是始蒞任兆麒乃專轄  
浙江十一月疏言浙江督標原設三營前因歸併  
浙閩總督以福建督標中營為右營以右營官兵

撥防東畧改為太平東畧營今復設福建總督前  
改右營仍歸福建前調東畧營仍歸右營以備三  
營經制其東畧地處偏僻將太平營官兵酌量撥  
防并撥嚴協金華協兵各百名歸太平營叅將管  
轄下部議行十年五月疏言溫衢處三府有康熙  
七年分撥投誠兵丁領墾荒田定限三年後起科  
今已屆期尚多開墾未成熟者收穫歉薄養贍不  
敷請照山東山西二省墾荒兵丁之例寬限一年

起科部議從之十二年三月京察以任總督後未  
著勤勉照才力不及例降二級調用十三年十月  
授直隸援勦提督缺尋裁十四年正月補崇明提  
督疏言崇明一邑四面環海中間平坦沙地數百  
里遇有寇警全資馬力今營制僅馬兵三百未足  
應用臣遴選家丁三百名又外募二百餘名購馬  
數百匹練成一旅請酌添額餉百名或改步兵百  
名為馬兵其未敷之餉臣自措辦事下部議以軍

興費繁令其於本標額兵遇缺充補二十二年疏  
報守備柴桂芳等勦賊海洋獲賊船三并器械無  
算

詔勘閱江浙海界之侍郎金世鑑副都御史雅思哈就便  
察核覆奏柴桂芳等所獲船係在洋游移之賊並  
未督軍交鋒兆麒所報不實應降二級調用得

旨削去加級紀錄以旗員補用尋補黑龍江總管三十一  
年以母老乞解任從之四十七年六月卒年八十

子殿衡康熙二十二年由廕生授兵部員外郎二十四年遷刑部郎中二十六年轉直隸井陘道尋調甘肅西寧道三十七年二月部推廣東按察使上以擬陪之糧儲道張仲信陞補

諭獎殿衡在西寧居官甚好內外百姓俱為稱揚遇布政使缺即擢用是年十二月授江蘇布政使四十三年三月擢湖廣巡撫十二月疏陳四事一招墾荒地捐納牛種荆襄鄖陽等處荒地尚多宜聽民開墾六



年陞科其無力自備牛種者應令湖北文武官捐  
資給與每荒地一頃給銀十兩次年按額起科計  
所墾地畝銀數酌與各官議敘一零星錢糧請就  
民便以碎銀制錢輸納一修築隄塍應照隄內田  
糧均派沿江地畝隄岸鱗次大小不一總以自護  
田廬緣修築等役豪強規避前督臣郭琇奏定照  
糧役夫原指隄內之糧有司奉行不善均之闔邑  
致隄外之民以害不切已而不甘赴役隄內之民

以分任有人而誤于觀望請嗣後就各隄內按糧  
均派修築一挖壓田內地應估價均補湖北安陸  
荊州江水湍急年久之隄必須靠築月隄其築隄  
基址及所取之土皆有礙於附隄田畝應丈明畝  
數估定價值以保護隄內民田均攤補償業主疏  
下部議碎銀制錢不准折收餘如所請四十六年  
二月疏言常平倉捐助米穀原以備賑湖北各屬  
自康熙三十一年停捐舊貯穀石遇連歲災歉支

用已盡請照例捐補以備需用得

旨俞允四十七年丁父憂五十年復任湖廣巡撫五十六年十一月疏言沔陽衛屯田五百七十餘頃原屬窪地遇水易淹舊係給軍自種自食嗣因辦入勸墾陞科例每畝徵糧一斗有奇賦倍民田又屢被水災積年逋欠軍丁籲訴難支應減半徵糧與清浪一例以紓軍困事下部議從之十二月卒於官年六十有二

欽定八旗通志卷二百一

欽定四庫全書

欽定八旗通志卷二百二

人物志八十二

大臣傳六十八

漢軍鑲白旗二

屈盡美

張問

白潢 沈廷正 劉輝祖

屈盡美

屈盡美漢軍鑲白旗人由廕生補佐領順治九年

授兵部啟心郎十八年六月遷大理寺少卿七月

遷宏文院學士十月授廣西巡撫康熙二年六月  
疏言粵西兵燹後人民稀少武藝未嫻請停癸卯  
科武鄉試

久之十二月擢廣西總督是時平樂府猺獞流劫富川恭  
城修仁荔浦四縣三年六月盡美攻谷塘下井諸  
寨擒斬二千餘又勦恭城縣毛塘等猺分攻鳳頭  
牛尾諸寨檄湖廣兵堵截清溪源口盡美率兵由  
石口寨進賊敗遁擒逆首黃天貴諸寨相率降九

月令監軍道黃惟鍛攻修仁縣古西猛寨誘擒賊  
首廖萬千移師擊永福縣六貢窠賊周晚並妖賊  
李太平斬之進勦南隘街村及八排巴山村皆捷  
賊悉平四年裁缺回京候補六年六月授漕運總  
督七月疏言現裁推官漕糧乏員監兌臣已通行  
各省令知府監兌以速漕務

上以盡美不請旨擅通行下部察議部議於同知通判內  
斟酌委用盡美降二級准抵尋疏言楚省有漕府

分同知均有清軍及經收廠稅責糧務乃通判職  
司應專責監兌從之七年江西巡撫董衛國奏歲  
暮回空糧舡未到兌糧必致遲悞

上令盡美明白回奏尋奏運糧河道變遷始則清口被淤  
繼則淮水漲發又黃家嘴駱馬湖等處稽阻致糧  
船遲到現促即日南下八年衛國復疏報上屆尾  
運船隻至今仍未盡到新漕不能依限過淮部議  
盡美遲悞降三級調用得



旨依議解任未補官卒

張問政

張問政漢軍鑲白旗人順治九年由貢士授直隸唐縣知縣十三年行取以御史用十五年八月補河南道御史十一月

命巡按廣東十六年九月疏言廣東烟瘴之域文武視為畏途致委署濫而吏治日清查衛所守備千總屯糧責任攸關現在部選到任者十八員未任者一

員委署者十六員至香山等十五所則現缺無官

請

勅部將選補各員早令赴任庶委員可撤軍糈不誤又疏  
言兵以衛民民以養兵廣東兵驕潮州駐防為甚  
一年兩次戍守倏換倏更兵民日成水火鎮臣許  
爾顯莅任後約束嚴明兵民相帖臣抵潮郡士民  
懇留該鎮皆謂防兵少一番更換民獲無窮休息  
是知該鎮久駐不但潮民稱便凡經過州邑並受

其福現經平南王尚可喜題定一年一換請嗣後  
三年一換以綏靖地方均下部議行十七年四月  
疏言鹽餉關係軍需分毫難容逋欠查富賀一埠  
餉納廣東商居廣西營商張標等倚總兵馬雄勢  
逋餉三年致鹽道鹽司莫可追求在張標等固法  
無可貸而馬雄以封疆大臣庇奸抗課祈

勅部嚴追以懲積玩得

旨張標等提問馬雄降二級留任康熙二年

命巡視兩淮鹽政尋奉

旨內陞以正四品銜食俸借補湖廣道御史十二年六月

遷光祿寺少卿八月轉大理寺寺丞九月遷大理

寺少卿十八年五月遷太僕寺卿七月遷通政使

八月擢工部右侍郎疏言前因兵餉不繼開例捐

納道員以上定例不准捐復獨廢黜知府許援例

復職自開此例部選還職不一其人有甫經革職

即納銀候選者名為急公實則馳心名利之場借

此營私取償於下吏及百姓耳雖未敢必其全屬  
不肖然前無可取後復何效貪污既足敗檢庸懦  
亦堪誤事請嗣後降調知府援例復職試其才猷  
量予同知等缺三年無過方予陞轉其革職知府  
祇許降捐同知既不沒急公之義復不輕方面之  
任飭官方清吏治似為有益部議知府係州縣表  
率其因公降級者仍准捐納還級以原官用革職  
概不准捐從之十九年因病乞休

諭解任調理二十年卒

賜祭葬如例

白如梅

子色純

白如梅漢軍鑲白旗人初任佐領順治十一年正月授督捕右理事官十月遷都察院左僉都御史十二年十二月授山西巡撫十三年四月疏言外省大吏廉訪屬員劣蹟去之惟恐不速原非先審而後劾及由按察司轉行府廳各官逐款研訊須

證據明確乃得定案斷不能事事與原叅相合故  
督叅撫審撫叅督審不令原叅者究擬所以防流  
弊也乃在外讞牘例係通詳必待原叅者批允方  
得繕疏未免強求情節符合駁而又駁請嗣後惟  
許承

旨究擬者核詳定案原叅上司不得批駁果見有徇庇開  
脫情弊另行據實糾叅將承問及批允之官議處  
則苛求絕而讞擬公矣疏下部議如所請十七年

以督催協濟陝西四川兵餉加兵部尚書銜又以  
協濟雲南四川兵餉全行起解加太子少保十八  
年六月疏言陽和巨鎮僅一守備難資彈壓請以  
新平叅將更調朔州為雲西極邊請以馬邑守備  
移駐天成陽和二衛屯糧舊多逋欠應令中路通  
判移駐陽和稽屯清餉又言晉省鑄錢向於太原  
平陽潞安汾州設爐十座大同設爐二十座多少  
不均請減大同爐座之半增入省城庶不致此贏



彼紕矣疏並下部議行九月擢陝西總督康熙四年五月裁併山西總督於陝西即以如梅任之是年冬厄魯特台吉阿喇納所屬蒙古越定羌廟邊界遊牧山丹衛遊擊房玉柱理論不從率兵驅逐衆蒙古抗鬪傷害我兵十數人我兵合擊乃遁去鎗斃及斬死者二百餘人獲馬二百餘牛羊千餘如梅疏報不言我兵陣亡及陣獲馬匹牲畜而僅云互如對敵殺傷蒙古三十餘人五年九月

上察知其事

勅理藩院遣官以所獲牲畜給還蒙古台吉阿喇納

恩卹陣亡受傷兵丁下部察議如梅隱諱罪應革職任

命留太子少保革去總督十五年九月卒子色純初任內

院副理事官順治二年遷刑部啟心郎九年遷弘

文院學士充纂修

太宗文皇帝實錄副總裁官十一年充順天鄉試正考官

擢吏部侍郎十三年四月以員外郎朱世德司權

河西務虧缺稅銀吏戶二部援

恩赦免議部臣並坐瞻徇色純罷任六月起秘書院學士

明年充

經筵講官十五年遷禮部侍郎兼文華殿學士十七

年六月

命署河道總督色純以祖王銘老病疏辭八月授總督倉

場侍郎康熙二年考滿加工部尚書銜仍督倉場

事四年至七年屢以漕糧全完予紀錄八年八月

上以前此鰲拜輔政時薦劾不公

特詔舉行察典以色純不孚衆論

命降二級隨旗行走十三年七月起為江西巡撫時逆藩

吳三桂耿精忠反賊黨分道窺伺江西色純既之

任疏言逆賊逼脅良民割去髮辮意謂

天兵所到必以無辮加罪因而鼓惑人心負隅死守若得

明勅領兵將弁專戮抗拒賊人其愚懦之民被脅割辮者

概行寬免則脫歸恐後不為賊用矣至逆賊屯聚

多在城池村莊之外敗竄後所留悉是良民宜令  
無所驚怖被賊擄掠子女許各認領並免收繫疏  
下兵部議行十二月色純遣遊擊李天柱敗精忠  
偽將王九萬等於會昌又敗之湖城擒偽副將楊  
權又遣遊擊田振敗賊西塘擒偽都司鍾喜泰等  
十四年二月遣天柱敗三桂偽將陳昇於湯村復  
龍泉縣又遣同知顧岱宣諭興國瑞金雩都諸土  
賊降其魁謝吉祥曾鳳謝大全等十一月卒於官

賜祭葬如例諡勤僖二十三年正月

上諭大學士等曰督撫乃封疆大臣通省民命所關

世祖皇帝時所用者尚屬循良逮至輔臣時用張長庚白如梅張自德賈漢復屈盡美韓世琦等匪人致百姓困苦已極今相沿成習尚未盡改現在浙江湖廣總督江寧巡撫員缺必擇賢能補授方於地方有濟十二月

諭八旗漢軍都統等曰國家自

祖宗定鼎以來委任漢軍官員與滿洲一體其中頗有宣

猷効力者如孟喬芳張存仁輩朝廷亦得其用比年漢軍居官者大不如初每赴外任多攜僮從汰侈糜費惟務黷貨累民恣肆放逸未能謹守法度如張長庚賈漢復白色純等不可勝舉屢加申飭尚多因循未見改轍茲者巡行江南衆口一辭稱江寧知府于成龍清廉愛民朕已超遷為安徽按察使又特名其父賞賜以示褒美廉吏至意凡爾八旗漢軍自今以後悉宜洗心滌慮痛除舊習或子弟官守在外宜各貽書訓勉果有潔已

愛民如子成龍者朕立行擢用如猶怙非不悛國有常法不能為此輩貸也三十三年三月復

諭大學士等曰從前總督張長庚屈盡美巡撫白色純韓世琦等居官不善不數年間子孫窮困由此觀之徒貽惡名此輩所貪取者今安在哉

馮國相

馮國相漢軍鑲白旗人父有功

太宗文皇帝崇德八年從征明中後所前屯衛凱旋授佐



領順治元年隨都統葉臣征山西以紅衣礮攻克  
太原城二年隨都統金礮征湖廣擊敗偽總兵馬  
進忠於武昌獲賊船十有三敘功予雲騎尉世職  
五年授杭州協領七年九年疊遇

恩詔晉世職至三等輕車都尉十八年卒國相襲職康熙  
十三年吳三桂叛據湖南國相隨順承郡王勒爾  
錦往征賊將陶繼智劉之復等犯宜昌國相領隊  
發礮擊卻賊衆尋隨貝勒察尼敗賊於岳州十八

年正月隨都統根特敗賊虎渡口遂進征澧州常德屢立戰功十九年凱旋授佐領尋授叅領三十年十二月擢鑲白旗漢軍副都統三十四年調右衛左翼副都統時噶爾丹侵擾邊境國相率兵至阿爾蘇台偵賊聲息明年

上親征駐蹕克魯倫河國相運礮至軍前即隨撫遠大將軍費揚古等由西路督兵敗賊於昭莫多俘獲無算是年冬還京授鑲白旗漢軍副都統三十六年

叙功予雲騎尉世職合所襲之職為二等輕車都尉尋調鑲黃旗漢軍副都統四十一年擢正藍旗漢軍都統五十七年十月卒

賜祭葬如例子毅襲騎都尉六十年由叅領授廣州副都統明年擢廣東提督雍正元年十月卒於官祭葬如例子瀚襲騎都尉三年四月

上以八旗公庫事務惟國相辦理時綜計明析下部議叙於現襲之騎都尉加一雲騎尉十年九月

諭九卿曰原任都統馮國相謹慎小心撲誠自矢服官辦事從無過愆向來各旗公庫俱有虧空惟馮國相所管正藍旗全無欠缺此即其出納謹嚴操守潔清之明驗伊係朕藩邸之人知之有素應否入賢良祠會議具奏尋九卿以詳考事實洵為賢良大臣允宜入祠議行乾隆元年

詔九卿核議已祀賢良諸臣之應追諡者列奏

賜國相諡曰桓僖

蕭永藻

蕭永藻漢軍鑲白旗人父養元管佐領永藻由廕生補刑部筆帖式康熙十六年六月授內閣中書十七年四月遷禮部員外郎襲管佐領二十四年八月遷郎中二十七年監督湖口關稅務尋授御史二十八年八月遷內閣侍讀學士三十四年七月遷順天府尹三十五年十二月擢廣東巡撫三十七年三月疏言開爐鼓鑄原為便於兵民而設

粵東偏在海隅用錢無多開鑄將及三年錢文倍  
增錢價益減現在每千市價三錢三分不等兵  
丁月餉按定例而支照市價而用已屬苦累距省  
遙遠各營搬運需費領一兩之錢不及數錢之用  
民間亦因錢價日減貨物難行請暫停鼓鑄從之  
八月疏言鼓鑄雖停其局内存錢照舊搭放兵餉  
自夏徂秋錢價更賤兵丁月餉無幾請即支給全  
銀俾有實濟俟錢價稍昂再行搭放十一月疏言

兩廣鹽政沈愷曾一年差滿請展限一年俾清理  
積年未完課銀五十餘萬兩未銷鹽引一百餘萬  
道部議並從所請三十八年十月疏言開山掘礦  
招集多人羣聚一方良莠混雜臣受事之初再三  
飭禁近有長寧縣匪徒集衆私採臣即飭惠潮道  
察究完結知縣尤鵬翔不先通報請

勅部議處下部議革鵬翔職三十九年正月疏言廣州府  
屬之南海番禺東莞新會四縣幅輳遼濶逼近海

洋最為難治必須選調賢能前撫臣高承爵選員  
請調南海東莞部議二縣不在欠糧難完應調之  
列未准行臣思在昔荒逃甫復故止就欠糧議調  
今遷復日久不患民賦逋欠而患盜賊未弭請以  
清遠乳源茂名海豐知縣張象乾姚炳坤錢以壇  
白章調補南海番禺東莞新會四縣得

旨如所請行後不為例十二月給事中湯右曾疏劾永藻  
與總督石琳于瓊州府屬擾害黎峒致黎人爭鬪



事遲至一載始行具題其交相徇庇可知縱貪殘  
之屬員朘民漁利吏治安得不敝民生安得不困  
民生既困遂為盜賊如在海則有電白陽江在山  
則有英德翁源及普寧縣富美寨等處橫行劫掠  
雖經勦滅而民間受害已多不知平日之察吏安  
民者奚在也

上遂調廣西巡撫彭鵬至廣東永藻調廣西仍

命回奏下部察議應降二級調用得

旨從寬留任四十年三月入

覲

諭曰彭鵬在廣西居官甚好爾可效彼所行爾在廣東時盜案甚多牽連數百人俱罹法網近復有黎人之事爾居官果善豈致如此爾所薦人亦未必賢嗣後但當擇清廉者舉之居官既廉辦事自善即錢糧稍有未完百姓自為彼勉力急公也爾其識之先是彭鵬疏請禁革

廣西私派積弊

上命永藻察奏十一月疏言粵西向因軍興差役浩繁費  
無所出從田糧加派銀兩迨承平後士民倡議照  
糧攤派以應公務名曰均平相沿已久是以前撫  
臣題請禁革臣莅任伊始即屏絕餽贈嚴飭所屬  
不許於正供外妄派絲毫竊恐愚民易於蠱惑不  
肖有司仍蹈故轍乞

勅部行文勒石嚴禁以垂永久至布政使派修衙署銀係  
各屬自捐惟左州知州劉正國私派民間銀八十

兩應議罪其巡撫衙署所有鋪陳器具僉稱在省  
司道府湊集供應非出派捐臣已盡數發還謹一  
併題明事下部議如所請劉正國革職逮問四十  
一年五月疏言粵西僻處邊陲猺獠雜處而南寧  
太平慶遠思恩四府地接交夷兼轄土州縣司崗  
寨五十餘處尤為難治前經九卿議定四府屬員  
缺擇桂林平樂等府品級相當者調補三年俸滿  
陞用惟是南太慶思四府廳州縣共二十九員桂

林平樂等五府知縣以上共五十八員當奉行之  
始尚有久任之員可以選擇迄今一十六年除調  
補叅劾陞任病休外多係任事日淺才守未知即  
有久任者亦係循分供職與選擇調補之例不符  
前撫臣彭鵬于調補各員恐以地方之美惡為趨  
避酌一掣籤之法實屬至公嗣後四府官員缺出  
應仍以五府內之廉能者掣簽調補如無可調之  
員請

旨特簡補授

上是其言下部議從之四十五年四月內遷兵部右侍郎  
時湖廣總督石文晟疏劾容美土司田舜年違制  
不法各款

上命左都御史梅鋐內閣學士二格會審與文晟異議復  
命永藻與大學士席哈納侍郎張廷樞往湖南察審還奏  
舜年已故被控僭越各款俱虛誣控之向久忠等  
擬罪如律文晟不能詳察草率題叅應議處從之

四十六年正月擢都察院左都御史九月遷兵部  
部尚書四十八年十二月

命同副都御史王度昭往湖南察審巡撫趙申喬提督俞  
益謨互訐事覆奏益謨違例抽取衡州協兵餉三  
十五名致兵丁缺額應革職所訐申喬貪虐各款  
俱不實但申喬每事刻意苛求失大臣體亦應革  
職

詔令益謨休致申喬從寬留任四十九年四月調吏部尚

書十一月授文華殿大學士五十六年三月

命在議政處行走六十一年

世宗憲皇帝御極以永藻勤慎廉潔加太子太傅銜

命往馬蘭峪總理

陵寢事務五年十一月宗人府奏閒散宗室廣善

恩給公銜在

陵寢居住越分請

安永藻不行攔阻應革職得



旨蕭永藻向來操守甚好每自恃其有操守驕矜偏執諸  
事任意朕因其年逾七旬為舊日大臣加恩優待念

景陵事重特命伊總理且令就閒散之地以頤養暮年正  
所以善全之也乃不知感恩事事推諉瞻徇不實心辦  
理如請安來京不候旨即去此等疎慢之處甚多惟知  
阿諛允禩以長其傲慢狂肆之罪而其特行條奏者則  
裁汰舊設之官員減去祭祀之乳牛以為節省錢糧之  
計不知大體深負委任著革職仍在

陵寢地方居住効力七年正月卒年八十有六

白潢

白潢漢軍鑲白旗人由筆帖式授內閣中書遷侍  
讀康熙三十九年授福建糧驛道四十二年丁父  
憂四十五年補山東登萊青僉事道四十九年遷  
貴州分守貴東叅議道五十三年遷貴州按察使  
五十五年擢湖北布政使未赴

命護理貴州巡撫五十六年六月改江西布政使七月擢

江西巡撫五十七年疏言江西湖口縣關地形甚險兩山插江夾峙商船候驗停泊虹橋港逼近山脚夏秋僅容小船一二百冬春水涸往來報稅必由梅花洲嘴紆行十餘里過水漲則江湖二流橫激港口微風即蹈不測惟關右里許山勢開濶有武曲港可容千艘但冬春亦涸請自江岸至港口大為挑濬於港口建草壩二以阻淤沙外加排椿以固壩根可利停泊商民俱便部議如所請行五

十八年疏言江西科第之盛遠勝浙楚康熙三十年奉

旨增額江西七十五名浙江七十一名湖廣七十名是向

來中額多於浙楚四十一年浙江湖廣二省以督  
臣郭琇撫臣趙申喬請照江南中額增至八十三  
名江西未經題請不增至五十年

特旨增直省中額浙楚又各增十六名江西僅增十五名  
近科入場士子多至一萬二千餘人而中額不得

比於浙楚通省合詞請題廣額懇

恩將江西鄉試中額照浙楚一例取中疏下部議從之五

十九年七月疏言州縣因公挪用虧空錢糧請照

霉爛倉穀例者不論在任解任及分賠之知府能

於限內全完准其開復如所請行尋因病乞補京

職授戶部右侍郎十月擢兵部尚書六十一年十

一月

世宗憲皇帝御極

命潢協辦大學士事務十二月晉

文華殿大學士潢具疏懇辭

諭曰朕素聞爾居官操守甚好巡撫江西時綏輯地方甚有裨益及任兵部尚書清勤恪慎

皇考每加優獎今朕以機務重大資爾料理爾即遵旨供職不必固辭時恭纂

聖祖仁皇帝實錄以潢充總裁官雍正元年

賜詩一章有蓼蕭多雨露應及老成人之句三年七月以

病乞解任從之先是江西南昌吉安撫州饒州四府有落地稅銀千三百餘兩各以大使徵收潢以官役費浮於稅不免苛徵將四處稅銀停徵巡撫司道公捐銀代完假造商民名冊報部稅大使已無職掌仍舊設立後任相沿辦理未奏至是江西巡撫汪滢奏其事並請裁汰大使

上諭大學士等曰此項稅銀不應徵收則白潢當奏請於聖祖仁皇帝施恩豁免若係應徵則令商民完納何得公

捐完課曲市私恩似此沽名邀譽豈人臣事君之道至  
汪澐凡事不能據理而行乃將白潢所行悖理之事奏  
聞冀朕批示爾等同九卿詢問回奏尋奏白潢沽取虛  
名擅變舊例應嚴加議處汪澐妄行瀆奏亦應察  
議部議白潢照溺職例革職汪澐降二級調用課  
稅仍照舊例徵收稅大使不得於額外勒索從之

乾隆二年潢卒三年九月

上諭原任大學士白潢向在巡撫任內有清廉之名告



休後緣事革職今聞病故著給還大學士銜以示優待大臣之意

沈廷正

沈廷正漢軍鑲白旗人康熙四十一年由筆帖式授湖廣羅田知縣四十六年十二月遷陝西商州知州五十三年八月遷蘭州府同知雍正元年二月遷臨洮知府六月調延安二年七月

上以廷正居官聲名甚好加道銜改西安知府未赴任即

擢河南開歸河道三年十二月遷河南按察使嗣  
奏豫省臨河州縣應以黃河為界分管南北以便  
巡防其附近兌漕水次之沿河地方豫為廣貯倉  
糧以濟漕運至丁銀俱按地派徵以廣

皇仁事下部議行四年三月遷福建布政使八月部議廷  
正任延安府時會審虧空案限滿擅挪西安貯庫  
銀代完應革職得

旨沈廷正在豫省開歸道按察使任內聲名俱好從前此

案乃畏懼年羹堯勢力逼勒所致並非伊之本意從寬免革職五年四月奏言閩省倉庫多虧缺督臣高其倬深知陋弊令臣委員查辦閩省捐監積穀通一百八十二萬四千二百二十二石除征臺軍需并連江水災豁免及叅追虧空等項外餘各屬貯倉穀據稱有累年發糶尚未買補并前任流交現存穀價者有碾米給兵尚未徵補者有累任流交民欠及發價採買未補者現存貯數合之原額數未及

半此倉貯之所以有名無實也平糶原以濟民秋  
收應照數買補無如各屬延緩概存價銀令俱令  
解貯司庫以杜侵挪秋成時發還買補又兵米原  
係地方徵收支放祇緣青黃不接時暫借倉穀碾  
給乃借後任民拖欠以致累年未清令飭所司照  
數徵補不得以完作欠又流交穀價乃累任州縣  
交代倉貯缺額遂折價移交近年穀價稍貴不敷  
買補價雖實貯穀已虛懸更有流交民欠一項據

稱發價採買未交累任相沿僅存空領穀無實貯  
以上各項前於三年奏報案內俱皆捏造實貯此  
番徹底盤查飭令各屬據實具結各道府仍照往  
年概出實貯印結臣詳明駁換而限期迫屆隨將  
報到穀數彙造草冊呈送督撫經署撫臣毛文銓  
令臣將三年捏報實貯改作四年平糶臣查三年  
捏報實貯穀數一切流交民欠存價未買等項在  
內若改作四年平糶固可符捏報實貯之數然臣

何敢改移年分自蹈欺妄各府縣與巡撫通同一氣紛紛具報買補將完何從前艱於採買而此時如此之易欺飾顯然臣寧受巡撫與屬員之怨不敢少有瞻顧據實上陳得

旨朕原謂毛文銓不妥高其倬亦慮其偏於善柔爾此奏甚屬可嘉秉公正色勉力為之六月

上命常賚為福建巡撫以廣東巡撫楊文乾赴閩會同盤查廷正即以通省各項倉穀及累年未完正襍錢

糧江浙運閩米穀糶賣價銀各數按項造冊徹底  
清理內有虧空那移官侵吏蝕及虛開民欠者通  
詳題叅仍勒限完補至存庫穀價有多寡之不同  
地方有產穀不產穀之分或往隣省購買或於本  
地採買仍立限運回收貯先後具疏以

聞均蒙

嘉獎十一月擢貴州巡撫六年五月部議廷正於延安府  
任內失察甘泉縣侵蝕給賞老民銀兩應降一級

調用得

旨從寬留任又

諭曰沈廷正任內處分之案甚多朕俱開恩寬宥者因伊前在福建布政使任內將通省錢糧倉穀未清之項徹底查明據實陳奏朕遣楊文乾等前往確查始將積年虧空盡行清理實係沈廷正陳奏之力朕彼時不將沈廷正之奏宣示於衆者因沈廷正現為閩省藩司恐清查之員有所瞻顧牽制且藩司專司通省錢糧凡各屬



未清之項或有干涉沈廷正之處今楊文乾等將各項清查歸結沈廷正已陞黔撫而福建藩司任內並無絲毫未清之項實屬不徇情面實心任事之員則朕屢次加恩寬宥之由理應曉諭內外知之七月疏言布政使祖秉圭與臣籌畫糶借倉糧並嚴禁地方官於秋收後派民買送米穀事臣自入境時即訪聞黔省各府州縣去歲平糶倉糧減價太多致秋成時官民買補維艱又賣糧惟委佐襍官監糶豪棍衙蠹

各捏戶口爭先糴買窮民終日不得顆粒及糴買  
時府州縣親戚家人勾同書吏將戥頭斗面任意  
高下臣飭各屬親身監糴不致欺隱秋成斷無不  
敷買補之理所有派發民間買送之弊嚴行禁革  
至借給倉糧在祖秉圭謂糴不如借臣愚以為糴  
糧尚有價銀存庫而借糧多係豪衿地棍串通滑  
吏為之誘一二窮民以呈首借領內多假托姓名  
或秋收少薄或經手官陞遷事故藉口延挨虛懸

倉儲故青黃不接時只宜平糶不得輕借若地方實係歉收窮民嗷嗷待哺無力糶買又應仰體

皇仁一面酌量照例借給一面繕摺奏

聞此暫時權宜非可定例與平糶並行也得

旨覽借糶二議汝所見是又奏言黔省各路生苗陸續向化惟黎平鎮遠平越都勻與楚粵接壤生苗多干

法紀而八萬古州九股生苗盤踞深山現經按察使張廣泗化誨招撫清理疆界臣以張廣泗隨帶

出力官兵須加賞賚即投順生苗亦應賞給花紅銀牌且張廣泗行營需費甚多請將司庫捐納公費銀一千兩以五百為豫備賞賚官兵苗民之用以五百給張廣泗為行營盤費

諭速行給與毋違是月調雲南巡撫仍署貴州巡撫十二月疏言前撫臣何世璽奉

勅建龍神祠將祀明臣王守仁之陽明書院移其牌位改作神祠查王守仁謫貴州龍場驛丞時講明聖賢

之學化民牖俗黔之人士始知誦習詩書臣考之  
記載訪之輿論王守仁實有功名教是以陽明書  
院素為貴州省城士子瞻仰讀書之所請仍其舊  
別建龍神祠宇得

旨此舉妥協之至何世璣素留心理學伊等皆各立門戶  
互相是非若云無心之失何至錯誤若此不必究論俯  
順輿情改建為是七年正月赴雲南任五月疏言曲靖  
府屬陸涼州馬廠因上流水漲淹麥臣仰體

皇上惠愛邊黎至意將馬厰被淹田地應輸本年糧折銀一千餘兩免徵奉

旨當日正以地非沃壤所以作為馬厰也照汝所請料理八年六月奏言宣威州新由土司改設州治請設學正一員下部議行八月授河東河道總督九月遷都察院副都御史仍留河道總督任九年六月奏言東省運河堤岸為漕艘往來要津汶上所轄之何家壩當汶河西岸蓄水濟運衝刷流沙為南

北運河關鍵因建立年久堤岸潰缺一遇汶漲沙  
流入運劉老石頭二口遂致淤墊淺澀急須照舊  
整理俾蓄洩有資俟估詳題請修築臣又念黃河  
工程較運河更為緊要今屈伏汎親由曹縣芝麻  
庄一帶查勘各工俱各平穩惟豫省儀封北岸趙  
家寨工程當全黃頂衝現今大溜掃灣直射堤根甚  
為險要星夜防護而祥符程家寨工逼近省城最  
為緊要業將北岸開挖引河導溜北徙正在守候

開放間北風連作全河勢注南岸臣親率各員駐  
宿引河工所俟水勢漲發風色順利即當相機開放  
諭亟宜恪秉誠敬以祈神佑竭力防護以盡人事也九月  
調直隸河道總督十年二月以病解任回旗閏五  
月卒

劉輝祖

劉輝祖漢軍鑲白旗人乾隆二十六年武進士授  
藍翎侍衛三十一年授四川永寧協左營都司三



十四年解馬赴雲南軍營三十六年隨征金川由  
西山溝攻喇嘛寺復由東山梁渡河攻卡了三十  
七年三月敗賊於達烏等處得

旨優叙尋遷福建建寧鎮標中營遊擊十一月隨大軍  
克甲爾木山梁夜渡河攻西山賊碉輝祖復偕守  
備崔文傑率昭通等兵踰溝破其石卡奉

旨議叙十二月調陝西黃甫營遊擊三十八年五月遷  
陝西陽平關叅將六月賊夜窺我當噶爾拉大營

知有備退擾陝兵營輝祖督兵百五十施鎗石力  
戰達旦殺賊八十餘額受石傷事

聞

賞戴孔雀翎擢湖南長沙協副將十一月署甘肅寧夏  
鎮總兵十二月大軍分隊抵格藏橋輝祖隨公奎  
林潜由深嘉卜攻斯第博堵以皮船渡奪木城二  
三十九年三月駐防絨布寨五月

命統領陝西兵六月隨大軍進攻穆谷七月偵賊伏卡

卡角山溝亟擊之賊敗入庚額特碉卡輝祖督兵  
分隊誘戰賊匪不出輝祖即駐守穆谷九月賊百  
餘乘雨擾西山梁土把總阿甲所守卡擊走之十  
二月攻賊碉賊潛出箐斷後援至敗遁四十年正  
月賊復出箐迎擊之殺傷甚衆六月攻布咱克分  
賊勢七月卒

諭曰劉輝祖在川省軍營四載帶兵打仗尚屬出力今  
因病身故亦屬可憫著加恩照總兵王萬邦之例交

該部議卹具奏尋

賜祭葬入祀昭忠祠

恩廕其子德陞以巡捕營千總用

欽定八旗通志卷二百二